

SCHLIERBACHER KERBSPRUCH 2001

Hallo Schlierbach, Schoffem, Langscht un Klescht,
gegrüßt seid ihr uff unserm Fest.

Un all ihr Leit aus Nah und Fern,
von de ganze Welt, mir houn eisch gern.

Seid gegrüßt hier in unserm Zelt,
mit hoffe, das eich de Kerbspruch gefällt.

Mir hawe wieder gesammelt viele Sache,
manche zum greune, manche zum lache.

Doch loßt eisch beim Esse und Tringe nit unnerbresche,
wenn mir hier sou rischdich uff die Pauke dresche.

Alle Schlierbacher Veroine ham disjohr die Kerb iwernumme,
un mir hoffe, daß mir noch recht viel Bier bekomme.

Unser Schlierbach, des is zwar nit grouß,
doch is bei uns immer was lous.

Was mir fer Theme houn, werd ihr jetzt hern,
un wens betrifft, soll sich dodrou nid stehrn.

Es werd nid weiter rumgeschwätzt,
mir fange an,
jetzt werd üwwer die Schlierbacher Begewweheide gehetzt.

1.)

Ach disjohr ham mern widder debei,
weil er is eischentlich jedes Johr im Kerbspruch droi.

Ihr kennt en ach all ob ihr Fraue oder ihr Männer,
es is unseren beste – de Schofsbecker´s Werner.

Er hat ach wieder veel gemacht,
die – die´s wisse ham ach schon driwwer gelacht,
doch das dem gude Mann oft was bassiert,
hot eischentlich jeder Schlierbacher kappiert.

Es brauch sich koanner wunnern wenn bei ihm umkippt en LKW im Feld,
doch de Schofsbecker hot´s nit gehert – weil de Hund hat gebellt.

Als dann de Fohrer vom LKW rennt zum Schofbecker hie,
moant der zu em – es wär schee wenn de mer mol helfe deest – denn do is
Fudder druff fer doi scheiss Vieh.

Sie ham´s probiert – sou gut wie´s geit,
doch de LKW immer noch nit schdeit.

Sie ham dann en Radlader gehoult – der hot´s dann gepackt,
es hot dann ach mim Fudder abloade geklappt.

Doch da die Schof jetzt speder Fresse erst grie,
muss er einische mim Schubkarn uff die Wies nuff schiewe.

Die Schof losse´s sich dann gut gei un sitze im Schubkarn wie en Rocker,
de Schofbecker is de Antrieb – des packt der locker.

De Schofsbecker is halt ziemlich fit,
un macht deshalb in Schlierbach jeden scheiss mit.

**Und die Kapelle spielt zu der Geschicht,
Schofsbecker!!!**

**(EAV – Ba-Ba-Banküberfall | Scho-Scho-Schofsbecker3x er is de Knaller
uff de Äcker)**

(gesamtes Lied 2x wiederholen)

**Mir danke unser´m Schofsbecker trotzdem das er uns ach disjohr widder
soin Bulldog fern Kerbumzuch zu verfügung gestellt hot.**

2.)

Letzt johr hatte mer oan vom Bersch,
disjohr ham mer oan der wohnt zwaa Haiser newerm Handy Zwersch.

Bus fohrn dut er beim Jungermann,
es is zwar nit mer en junge Mann,
ach die Feierwehr fährt er oft mol fort,
meistens in e oaner Schlierbacher Ort.

Doch er fährt ach gern Auto des is klor,
doch er fährt ach gern Fohrrad – glabt mer´s es is wohr.

Beim Fohrrad fohrn bassiern dem sache,
die dunn annern nit emol beim Sex mer mache.

Was dem bassiert – sache mir eich glei,
ihm schläft beim Fohrrad fohrn ob un zu es Pissgeschär oi.

Er schdeit dann vom Fohrrad ab – dut vorher oilenge,
dann geit er in de Busch – was er do macht – kennr ihr sicherlich denge.

**Un die Kappelle spielt hierzu,
mir soin mim Radel da.**

3.)

In Schlierbach bassiern bei mansche Leid sache,
die sinn fer oannern ziemlich zum lache.

Es is Winder in Schlierbach un es is kalt,
gott sei dank geit die Heizung – un mer erfriert nit sou bald.

Doch die Heizung geit nit sie is aus,
sie is wohl kaputt im ganze Haus.

Es is ihne dann baal oigefalle – es Heizöl is leer,
doch es is ja Samsdach – wou gri mer do jetzt noch her.

Sie froche noch nooch beim ihr´m Nochber – der hot gestern griet,
doch de Fu git nix her – weil er ja sunst friert.

Wie wolle mir jetzt heizze es ganze Wochenend,
vielleicht mit offenem Feuer – nur misse mer gugge das do nix brennt.

Sie soin nit erfrohn – sie worn froh,
un mondachs – glei moiends – wor neies Heizöl do.

**Un die Moral von der Geschicht:
Im Winder is es Kälder als draus!!!**

4.)

Letzt johr wor de Vadder im Kerbspruch drin,
dis Johr dachte er sich jetzt muß ich emol rin.

Er dacht sich was de Vadder kann,
kann ich schon long,
uff em Friedhof ham se sich getroffe,
un ham sich mal rischdisch voll gesoffe.

Die sache artet ganz schnell aus,
jetzt muss die kloo Schwester vom Schornstoofescher nach haus,
die heilt dann die Wodka Flasch aus de Kellerbar raus.

Die 3 Liter Gallone muß jetzt mit,
die hälft devo wird fortgeschid.

Nooch de Wodkaflasch ging´s schnell nach haus,
der ganze Wodka musst ja widder raus.

Gepackt hot er´s nit ganz bis hoam,
de rest musst en soin Vadder mim Audo fohrn.

De Kloa wor ferddisch mit de nerve,
die nächste 2 Woche durft er sich nit mit soine Kumpel´s treffe.

**Un de Vadder spielt jetzt fer soin Bu:
Nie wieder Alkohol!!!**

5.)

Mir ham en Mann bei uns im Ort,
der is im Tor oft ganz schei flott.

Er hot zwoo Döschder die ihn Nerve,
obwohl se des doch garnit derve.

Das se uffher´n zu nerve wollt er ihne kaafe en Fisch,
den wollte se nit - also gab´s en Wellesiddisch.

De Wellesiddisch hot gelebt e poor schene Johr,
dann fiel er um - wie de Mann im Tor.

Die Mutter hot sich gedacht wouhie mit dem Vieh,
ab in die grie Tonn un sel a vie.

Die Kinner froche - wou is er begrawe,
ei draus in de Ton des is doch koa frooch.

Draus in de Ton - do gehert der nit hie,
der brauch e begräbnis wie noch nie.

De Oba muss her - mir brauche e Kreiz,
damit mer immer seie wou unsern Vuchel im Garde leid.

Die kinner sin glücklich - mer glaabt es kaum,
de Vuchel leit jetzt begrawe am Gardezaun.

**Un die Moral von der Geschicht:
Wenn es Haustier sterbt dut´s ouschdenisch begrawe,
dann doun die Kinner ach nit gloche.**

6.)

Oh Gott - oh Gott moin Tank is leer,
do muss sofort neie Sprit mol her.

Ich fohr nooch Schoffem an die Tankstell - do bin ich glei dort,
des is ja schlieslich fast am Ort.

Die Fraa fährt lous - packt´s oune Problem,
moment des Audo kenn ich doch des do an de Tanke dut stehn.

Ai kloor des is ja em King dem alde Haus,
der kimmt ach schon vom bezahle raus.

Die Fraa fängt ou zu tanke - weil des gut geit,
nit das se´s vergist un dann doch noch schdeit.

Die King sieht se sou un moant - ei gude wie,
was host de dann vor wou willst de dann hie.

Ei King is doch klor - moin Tank nwor leer,
do fährt mer halt mol schnell an die Tankstell do her.

Sie ham dann noch e bisje geschwätzt - sou 10 Minude,
dann moant de King - ou ich muss fort - GUDE!

Die Fraa denkt sich ach - ja es wird zeit,
de Mann frocht sich bestimmt schon wou ich bleib.

Ich setzt mich in moi Audo un fohr hoam,
des Spritgeld dacht se kennt se wohl schborn.

Sie wor kaum von de Tankstell weg - greischd es laut,
STOP - die hot de Sprid geklaut.

Sie hot dann bezahlt un wor leicht entsetzt,
ewer des kimmt devo - wenn mer mim King rumschwätzt.

**Un die Kapellr spielt dazu:
Wer soll das bezahlen!!!**

7.)

Feste uff em Sportplatz sin immer schei,
besonders wenn die Leit nooch Haus dann gei.

Ach disjohr ham mer long gefeiert am Beach-Party Freidooch,
als letztes geit de Nochber vom Kerbplatz ham – weil er jetzt schloofe
moch.

Dehoam vor de Hausdier merkt er glei,
ich hab ja moin Schlüssel gor nit debei.

Ich klingel emol – vielleicht is noch oaner wach,
notfalls mach ich oafach iwwer´s Dach.

Üwwer´n Balkon deht´s gei – des wär koa Problem,
wenn do nit zum ausbaue Stoo dehn druff schdeen.

Die schloofe all - des kann nit soi,
ich laaf nochmol nuff zum Sportplatz - vielleicht lässt mich do oaner noi.

Do uwwer schleeft seelerouisch de Shorty vom Bersch,
de Hartl un unser´n Ehrenkerbborsch Jörsch,
er kloppt un kloppt doch koaner macht uff,
die drei denke sich - es wär die Bloane die geie die Wänn schleischd un
nit de Chefkoch im Suff.

Des gleiche Spiel fängt von vorne on,
er wor insgesamt drei mol uff em Sportplatz un widder dehoam.

Als er dann mol widder am Haus wor denkt er - ich kennt emol
Schdooschen ans Fenster schmeisse,
ach sou en misst ich dreff ja gor nit ---SCHEISSE!!!!!!!

Ich lesch mich jetzt zum schloofe uff die Bank,
es raiend jo nur un is nit sou kalt - Gott sei dank.

Er klingelt dann nochmol nooch ner Stunn,
hallo? Wer is´n do? Fraa ich bins mach die Dier uff ich kumm.

Die Fraa motzt dann glei - des is klor,
wer waas wou de Kerl die ganz zeit wor.
Sie sacht dann noch zu em - wenn de schlau wärst -hät´s de gewisst,
das im Schubbe en Ersatzschlüssel is.

Samsdach´s uff em Sportplatz musst er dann mit de Fraa Hoam gei,
bevor er widder ounne Schlissel vor de Dier dut schdei.

**Un die Moral von der Geschicht:
Host du koan Schlissel un bist voll,
hattest du wohl zuviel Alkohol.**

**Un die Kappelle spielt dazu:
Geh doch zu Hause, du alte Scheisse...**

**Text: geh doch zu hause, du alte scheisse,
geh doch zu hause, und nehm de schlüssel mit,
geh doch zu hause, du alte scheisse,
geh doch zu hause, vergess de schlissel nit!!!**

8.)

Jeden Samsdach es selbe - es is zwar nit scheen,
doch muss mer immer widder Gasse kehr´n gehn.

Die Gas kehrt sich nit von selbst - des is klar,
wenn sich doch mol oaner e Kehrmachin kaafe deht - des wär wunderbar.

Es leit uff monsche Gasse halt oft e bissje mei dreck,
des derf nit soi - der muss weg,
hot sich unsern KFZ-Meister aus Schlierbach gedocht,
un hot sich uff de Weesch zum Kermaschine-Händler gemacht.

Er hot ach glei die Stross mol rischdisch oigesaut - zum teste,
ei die kehrt ja prima - die is vom beste.

Er kehrt jetzt immer mit veel Spaß,
in Schlierbach unser Bruchweeschgas.

**Mir finne des gut - un denke der kennt eischentlich es gonze Ort
kehrn,
deshalb wolle mer ihn mi´m Goldene Besen zu Schlierbach ehrn.**

(Wir bitte unser´n KFZ-Meister de Peter uff die Bühne!!!)

9.)

Im Owwerdorf do is es schee,
weil es Rodhaus dort dut schdee,
ach die Lilli un die Kass,
im Owwerdorf do hot mer Schbass.

Doch ob un zu dut do wohl ach wos bassiern,
weil die Leit anschoind nit rischdisch parriern.

Im Owwerdorf do sieht des aus,
als deht mer sich was bresche - wenn mer geit aus em Houfdoor enaus.

Es kennt ewer ach soi - was in letzter zeit bassiert ab un zu,
das e Wildsau uff de Gas rumrennt - un gidd koa ruh.

Es is ja egal ob mer sich was bricht oder werd umgerennt von ner Sau,
die Hauptsach is - die Gipsfarb im Owwerdorf is un bleibt blau!!!

In oaner Familie wor´s glei zwoomal da,
erst hat de Sohn de Orm gebroche - un dann em King soi Fraa.

Ach vom zwodde Boiemoaster die Fraa hot en Gipps gehat glei,
sie hot gedacht des wer jetzt moode - do wor se sofort debei.

Ach ich hab en mitgemocht den Trend,
wer nit debei wor hot en wohl verpennt.

Also wenn ihr en Gips braucht weil ihr eich dout was bresche,
dout emol mit de Mode-Gips-Berater aus em Owwerdorf spreche.

Un die Moral von der Geschicht:
Es gitt´s Farbe vom Gips die sin sou schei,
mer muss nur zum guge dorsch´s Owwerdorf gei.

10.)

Die Kätha in Schlierbach hot schon längere Zeit zu,
doch die Leit die im Unnerdorf wohne krieen immer noch koa ruh.

Im Unnerdorf is die Kersch, de Metzjer un es Feierwehrhaus,
un die Stross richtung Schoffem naus.

Mer kennt moane das des denne Leit dut lange,
schlieslich schdein se schon ab un zu am Metzjer schlange,
doch es werd gebaut im Unnerdorf,
e Katholisch Kersch kimmt uff´s Heisje von de Kätha druff.

De Kloggetorm der dut recht houch hinnaus geie,
mer soll en halt von gonz Schlierbach aus seie.

Do muss wohl e Klogge noikumme – e riesengrous – kennt mer moane,
die heert mer dann von Schoffem bis noch Raare.

Oa gutes hot die sach – nämlich das des frieher e Kneipe wohr,
do werd mer dann mit Bier gedaaft – des is ja wohl kloor.

Nur monsche Schlierbacher Leit sin jetzt gonz entsetzt,
weil se noch nit wisse in wos fer e Kersch mer sich an Woinachde setzt.

Un die Moral von der Geschicht:

Lasset uns beten!!!

(Kapelle spielt Kirschenmusik)

11.)

Unser'n Owwerförster is en gonze Dolle,
deshalb nenne mer'n ach Bolle.

Wenn unser'n Freund Bolle is unnerweg's,
sofort in die Rodstubb geht's.

Es erste mol geit er mojud's um siwwe dort hie,
dann werd se noigelehrt die gute Brie.

Er geit dann Hoam sou um 10 – 11 Uhr,
do git's nochmol en Schnaps – nadirlich pur,
dann leschd er sich hie un schläft e Zeit,
un wenn er uffwacht is es glei – widder sou weit.

Sou um 4 – 5 Uhr kniet er sich widder rein,
es geht dann ins Kleingärtnerheim.

Wenn er dann Hoamkimmt lässt mern am Rodhaus raus,
weil mer denkt der packt's allo bis nach Haus.

Dcoh es klappt nit er fällt um --- BATS,
mer kennt ja denke der hat zu veel Schnaps.

Er werd dann ins Audo gesetzt un werd gefohrn hoam,
nit das er noch fällt un bricht sich de Orm.

Is er dehoam - geit's glei ins Bett,
das er de nächste Mojud um siewe widder kann weg.

**Un die Kapelle spielt dazu:
Es Geht mir gut!!!**

12.)

In Schlierbach hot sich oaner wos gedocht,
un hot mol bei em Gewinnspiel mitgemocht.

Die Frooch wor nit schwehr - er hot´s glei gewusst,
mitgespeelt hot er eischentlich nur aus Jux.

Halb Schlierbach hot dann Samsdooch´s owwends Fernseh geseie,
sie konnte die Welt nit mehr verschdeie.

Die meiste dochte erst sie henn gespunne,
doch de Peter hot en Smart gewunne.

Er fährt jetzt mit dem immer rasant uff de Gasse,
meistens nooch Bawwehause zum schaffe.

**Un die Moral von der Geschicht,
mol gewinnt mer un mol nicht.**

Rathaus-Dreck

Als Negativ Punkt wollte mer nochmol saache,
das es nit soi muss das am Rodes immer souveel Sauerrei
gemacht wird,
und es von monsche Leit heest die Kerbborsche wer´n es,
obwohl mir als nur dositze un unser Bier trinke, da mir ja koa Kneipe
mehr ham.

Danke

Wir wolle uns ewwer ach nochmol bedanke:
Un zwar bei de Feierwehr, de Sanger un bei de Fussballer das se uns
unnerstutzt ham un die Kerb es erste mol zusamme ausrichte
- ich denk es werd ganz gut.

Aber mir bedanke uns ach noch bei de Matzgerei Zang aus Schlierbach
un beim Getranke Kreh aus Schoffem fur die Spende fur die Pullover die mir
gemacht ham.

Mir hoffe, es is ougekumme,
und wurde nid als Beleidigung uffgenumme.

Es wor als Spaß Eisch vorgebracht,
wo man darüber tüchtg lacht.

Wenn nix basiert bei uns im Ort,
verliere mir im Kerbspruch dadrüber ko Wort.

Ach iwwern Mini Kurt nit - mir down en all kenne,
ach der dout sich anschoint ab jetzt benemme.

Benemmt Eisch bis zum nexte Johr,
donn gits koan Kerbspruch des is klor.

Sollt aner vergesse worn soi,
der kimmt halt nextes Johr in de Kerbspruch noi.

Un nun wünsche mer Eisch noch scheene Tage,
Tanze, Singe, was fern Mache.

Seit fröhlich un genießt eier Lewe,
loßt uns dodruf jetzt oaner Hewe.

Wem is die Kerb?	-Unser
Vom Nabel bis zum?	-Brunser
Un der is ach noch?	-Unser
Wann feiern mir Kerb?	-Alle Johr
Wie wird die Kerb?	-Klor
Was soi mer?	-Lumbe
Was rache mer?	-Stumbe
Was saufe mer?	-Humbe
Die Schlierbacher Kerb sie lebe	-Hoch
Un nochemol	-Hoch
Un nochemol	-Hoch